

籌辦夷務始末



一清二文
廣等
吳

籌辦夷務始末



〔清〕文慶等
纂輯

上海古籍出版社

籌辦夷務始末卷之六十八

道光二十三年癸卯七月丁卯軍機大臣穆彰阿等奏本年六月初四日山東巡撫梁寶常奏籌議海疆善後事宜一摺奉

硃批軍機大臣會同該部議奏欽此臣等逐條細閱除臨敵機宜及訓練兵丁從守島嶼三條該撫悉照前撫臣托渾布原議奏覆毋庸另議外其餘各條有就原議量為變通者有由該撫獨抒所見者臣等悉心參覈往返會商分別准駁開列於左

一原議增設水師官兵一條應如前撫臣原奏於登州添設遊擊一員以北汎守備作為遊擊中軍守備此外再添設千總一員把總二員外委四員額外外委五員戰兵三百二十名守兵八十名惟原議守備駐紮長山島該備衙署應不移置該島未經議及查長山島雖距府城僅止三十里究係隔一洋面中軍守備有收支兵馬錢糧之責其衙署未便建於島上且水師官弁首重巡洋原不應常川安居內署所有該守備衙署應請仍循舊制毋庸改建等語兵部查該增水師官兵既據該撫覆奏體察情形必應添設自應仍照臣等前議辦理所有該守備衙署應請仍循舊制毋庸改建等語應如所奏辦理工部查前項

衙署既據奏稱請仍循舊制毋庸改建應毋庸議

一原議另造水師戰船以資操防一條據奏廣東許祥光所造船式利於內洋而不便於外海山東北洋風勁距岸五六里即浪湧數尺及文餘且由廣東送至山東更須遠涉重洋實屬不能駕駛請將舊有戰船船頭改尖船尾放寬通船板片加厚船旁大木加粗先求堅固以耐風浪並擬兩旁多開礮門頭尾各安千斤大礮一位兩旁安千斤及三五百斤大礮十位各船艙密排烏槍擡礮及劈山子母等礮多位仍參用粵船制度於礮位之上安設護板使礮手在下藉以遮蔽舊船行動惟藉風帆今亦仿粵船大

八槳之制前後酌加八槳風力不足亦可藉槳以施人力稍變前規無須改作足收駕輕就熟之效至舊船向係委員赴江蘇上海縣民廠修造該處工匠熟悉形制新船亦可赴上海照造先令造成四隻撥歸新設北汎水師駕駛巡哨如果合用或再添造數隻或俟舊船屆期拆造一律照新制更改隨後分別酌辦等語應如所奏即由山東委員赴江蘇上海縣民廠修造仍令酌定期限與船上添配礮位一併確估價值另行專案奏明辦理至新船未成之時仍令暫雇商船俾免貽誤操防其前撫臣托渾布請由廣東代造船隻之處應毋庸議兵部查臣部例載山東

登州鎮水師營戰船。如應改造補造拆造。均委令實缺守備一員。會同文員。前赴江南監造。勒限一年完工。該撫將委員等領銀起程以後。抵江打造工竣各日期。逐一報部以備查覈。如該委守備能於一年限內造竣。航海駕回無誤。經鎮道等驗明如式堅固。即由該撫給咨送部引見。請

旨。照豫保例註冊升用。如至一年限外始行完工。計其遲逾月日。分別議處等語。此項船隻。應令該撫將委員領銀起程。抵江打造工竣各日期。逐一報部查覈。如能一年限內造竣。航海駕回無誤。經鎮道驗明如式堅固。即由該撫給咨送

部引

見。如至一年限外始行完工。覈其遲逾月日。報部議處。以昭勸懲而符定制。

一原議慎守礮位。嚴定操演章程一條。請如該前撫原奏。定以每年逢冬令按旬實放。其平時則限以三日一次輪流空演。不准一次間斷。久而機括嫺熟。自有得心應手之妙等語。臣等查三日一次輪流空演。如係裝藥試放。恐三日一演。火藥劇大礮口。礮位易於損壞。如僅演習式樣。則如何致遠推堅。不能有準。且虛演實發。聲勢懸遠。又恐該弁兵等專習虛架。臨陣仍不得力。應令該撫體察情形。悉

心另議。總須實收成效。不得沿襲具文。

一原議籌備餉餉。並各項經費一條。該撫奏稱。惟造船一款。現在改由東省委員赴江蘇上海製造。需用工價。尚難懸擬。應俟奏准後。參酌東省舊有戰船拆造價值。另行覈實估計。報部辦理。其常年用款。專擇殷商將捐輸經費酌發生息。按引提扣。不致貽誤等語。戶部查登州水師營議增官十三員。兵丁四百名。應給俸廉馬乾米折等項。無閏之年。需銀九千六百餘兩。有閏之年。需銀一萬三千餘兩。經臣部議覆。准於該省裁減驛站水夫工食等項銀一萬三千餘兩內。按數動支。餘銀仍造入季冊報撥。其水師弁兵巡洋。三月出哨。九月回哨。例餉之外。別有津貼口糧經費。新增弁兵。事同一律。歲需銀二千八百餘兩。修船幫貼銀七千八百餘兩。粵東代造戰船各款。歲需銀數千兩。並添設銜署製造礮位器械一切。現需銀七八萬兩。請動支官紳捐輸經費十四萬兩。發商生息。以備各用。亦經臣等以東商承領各案。帶本。週年均不能按網解息。屢於藩庫動墊。若再承領本銀。恐輸息不前。仍無裨益。議令無庸發商。並查明藩庫何款可動。即行覆奏。各在案。茲據該撫梁寶常詳覈覆奏。以巡洋經費。及添造戰船。添雇船工。水手。添蓋衙署。添製礮位器械。水操火藥。及沿海所貯礮位。

隨時修整操演各項約須銀七八萬兩常年用款約需銀一萬四五千兩皆係必不可少之款藩庫別無閒款可提請於官紳捐輸經費銀內動用並稱體察通網情形滯岸雖多累商而暢銷之處殷商尚居其半今帑本無多專擇殷商酌發不致遺誤亦請仍照前奏辦理復查前項所需既經該撫查明司庫並無閒款可提且現據片奏先後共收捐輸銀三十一萬四百四十餘兩制錢二十二萬六千三百餘串除解部十四萬兩外所存銀錢尚多應准彙實動支並於此內提銀十四萬兩發給殷商承領按月一分文息務飭年清年款以濟要需不得稍有延誤餘銀另款

五

存貯仍將發商月日並前開各款確數繕具清冊送部備查至所稱粵東代造船隻原議每隻工價銀五千兩茲改由東省委員赴上海製造工價尚難懸擬應參酌東省折造戰船價值另行估計一節並令查估後咨報兵工二部彙實辦理

一原議添設府倉以實軍儲一條請如該前撫所奏於登州城內添建倉廩二十餘間以捐輸海疆經費發商生息款內每年酌撥該府銀一二千兩按照時價買穀貯倉期於積至五萬石為止該撫奏稱登郡海濱窪下地氣潮溼貯穀過多易致霉變應飭該府察看情形如須分貯隨時

詳明酌辦等語戶部查登州添設水師建倉貯粟係屬兵食所關自應豫為籌畫經臣部於議覆該前撫摺內請准其於每年穀價平減時陸續發項採買積至五萬石而止其建立倉廩亦經工部議令照例委員查勘據實確估分別奏咨辦理各在案茲復據該撫梁寶棠請照原議添建倉廩每年酌發該府銀一二千兩按照時價買穀存貯仍以積至五萬石為率所有此項穀價亦應准於現議發商輪息所交息銀內每年彙實動支購買以重軍儲至所稱登郡海濱窪下地氣潮溼貯穀過多易致霉變一節該撫既經慮及必應諄飭登州府知府察看情形將如何擇

六

地建廩設法分貯之處妥議詳報仍由該府酌定實可貯穀若干如應量予裁減即不必拘定五萬石之數總期兵將實有裨益穀石不致霉變方為經久之計仍將隨時經理稽察章程督飭該府妥為籌辦以專責成而重倉儲一該撫另議添造礮架礮子一條擬照廣東新造礮架式樣就現有礮位逐一添造齊全不惜工價期於堅實適用又改造大礮子將合縫線痕打磨光淨並慮礮子過重不能致遠多用空心模大質輕又將空心礮子煉成熟鐵分作兩開中納碎鐵火藥仍舊扣合無異尋常礮子至出礮則一觸即行炸裂四面飛擊一礮可得數礮之用等語製

造火器務在精良。應如所奏。遴委細心武弁。授以做法。如式製造。該撫奏稱所需工價。多為則例所不及。應與添造礮架工料。按照時價。另行覈實估計報部。請於官紳捐輸海疆經費內支銷等語。工部查此款添製礮架礮子等項。應令該撫轉飭將用過工料銀兩。覈實造具細數清冊報部查覈。戶部查此項添造礮子礮架所需工價銀兩。應准於官紳捐輸海疆經費內覈實支銷。報部查覈。

一該撫議就府城形勢依山建臺。暗藏兵礮。以為後路策應。勘得西門外距城三里之紫荆山地當高阜。不顯峯巒。其山勢西北高於東南。登其上則郡城四面情形瞭然在

七

目。實為全郡要隘。其西北之西山口與長山島對峙。請就山勢平寬之處約地十畝餘。建立高臺四面排築三合土圍牆。臺下暗藏兵礮。臺上建蓋廟宇。使夷人由海上瞭望。但見有廟不知有兵。我兵即可潛伺動靜。夷人若由西山口撲岸。則突出橫衝。可以斷其西北來路。若由西山口轉折而南。繞攻西門。則從旁夾擊。亦可以斷其南路。若夷人徑由正北進撲郡城。則臺上開礮。據建瓴之勢。直搗其背。使之站立不住。或分兵以橫擊之。亦足使其腹背受敵。是據一要隘。而聲東擊西。面面皆應。且以我籌備後路之兵。轉而為攻賊後路之用等語。籌備後路策應較之專顧海

口海岸。為易得力。應如所奏。即飭集料鳩工。趕緊估辦。其所需工價。該撫請於官紳捐輸海防經費內覈實報部開銷。工部查前項應建高臺圍牆廟宇。應令該撫照例委員查勘。據實確估。分別奏咨辦理。戶部查前項添建礮臺廟宇等工。既准趕緊估辦。所需工料銀兩。亦應准於捐輸海防經費內覈實支銷。報部查覈。

一該撫議慎選將領。以固軍心。據奏東兵尚屬可用。惟將領各員賢否優劣。尚待詳察。現惟申明軍政。諄切訓誨。禁止役使。革除攤派等語。武弁役使兵丁。勢必荒疏技藝。攤派例餉。勢必任占空糧。錮習相仍。殊可痛恨。必須嚴行禁

八

革。以實操防。該撫奏稱取兵之將。務與士卒同其甘苦。共其寢食。然後肅以紀律。嚴以隊伍。並察武員之廢弛苛暴者。無論職分崇卑。擇尤叅懲。其訓練有方。愛恤士卒者。破格保薦等語。深得治兵之要。惟須實力講求。不可空言塞責。庶可收寬嚴互用。懲勸兼施之效。

一該撫議慎選守令。以固民心。而歸本於漕米錢糧。取民有節。詞訟盜賊。緝審克勤。果如所奏。不責守令以難為之事。而實政在官。實惠及民。賢者自可奮興。不能者亦可企及。官民一體。上下同心。無事則耕鑿相安。有事則効命恐後。何患不眾志成城。敵愾禦侮。惟言之非艱。行之維艱。全

在該撫正已率屬遇事勸懲毋苛細以掣其肘毋姑息以生其玩守令皆賢則民心自固而海隅永保乂安矣以上各條臣等悉心酌議意見相同末後慎選將領守令二條尤為善後第一要義應即責成該撫督同司道鎮將實力奉行久而弗懈內訌不生則外侮可禦兵食既足則教化自行庶幾海隅永固仰副

聖主內安外攘至意

戊辰

諭軍機大臣等穆彰阿等奏遵議山東海疆善後事宜一摺朕詳加披閱內嚴定操演章程一條演放礮位原以備臨敵制勝若

九

平時祇習虛文臨陣安得實用且恐為時過近出數過多易於刷大礮口損壞礮位著梁寶常於每年春秋二季親往督操每位不得過五出如果校閱認真自不至荒疏技藝無取定期過促轉致沿襲具文所奏空心礮子炸裂飛擊一條亦恐無裨實用緣礮子既出礮口空中炸開飛擊何處並無定準即如暎夷善於用礮其所用炸礮亦多有不能炸擊者該撫前在廣東當已目擊其事著即另行妥議辦理至慎選將領守令自係善後要策全在該撫實力講求正已率屬遇有武員廢弛計暴立時懲辦各府州縣隨時隨事董勸兼施切不可意存姑息尤不可日久玩生以副委任餘均著照所議辦理

閏七月壬申

諭軍機大臣等據祁墳等奏候選道潘仕成製造水雷已成現由該道員派令曾經學習製造並製配火藥之生員李光鈴議敘八品職銜潘仕豪議敘從九品李光業帶同匠役將水雷二十具火藥四百斤並繕繪水雷圖說一冊齎送進呈等語現在李光鈴等尚未到京俟齊到後再行試演至該道員潘仕成急公好義始終奮勉實屬可嘉惟業經疊次加恩賞戴花翎並加按察使銜應如何再加獎勵之處著祁墳等酌量具奏候朕施恩丁丑直隸總督訥爾經額奏竊臣前據天津鎮道稟報巡哨外委張得祥赴山東會哨在東省廟島地方見有雙桅

十

夷船二隻停泊該外委即行駕船折回具稟該夷船隨於七月二十九日駛至大沽攔江沙外相距海口四五十里二丈餘清水內寄碇等情經臣批飭派委明幹員弁駕船出海明白曉諭令其回帆不准駛進海口附片具奏在案茲據該鎮道會稟七月二十八日接據哨船回稟即飭陞補大城縣知縣高邦哲署大沽營守備劉朝勇等連夜駛出清水洋面確探於二十九日寅刻該夷雙桅船大小二隻甫經下碇該員等即傍攔親登其船查明內有廣東語音約二十餘人白黑鬼子約五六十人詢據通事馮姓稱係暎咭喇貨船裝載洋布呢絨等物從新州府販來售賣

並給喇號貨單閱看。當問新州府是何處地名。據稱夷人呼馬頭為州府。新州府即新馬頭等語。該員等諭以天津並非議准通商馬頭。不能擅許進口。且沿海盡屬漁戶。亦無人與之貿易。明白開導。該夷船無可辯論。求放三板船進口購買食物。該員等查其所需。不過麪肉蔬菜等件。允許代為買運。不必進口自購。並令退出六七里外下碇聽候。閏七月初一日。該員等攜帶麪蔬等物。復登其船給付。該夷船當時償還價值。該員等以所值無多。不必給價。即今起碇開行。該夷船頗知感激。並稱所帶貨物。此地既無銷路。即日開船。仍由山東向上海定海等處售賣。該員

十一

等目覩該夷船向東南駛行。一面令哨船跟蹤尾隨。俟駛出直隸洋面向往何處。再行具稟前來。臣查天津並非通商馬頭。一經委員明白曉諭。該夷船即起碇開行。尚知守法。第洋面四通八達。誠恐該船武中途折回。以及續有夷船駛至。希圖銷售私貨。臣仍飭該鎮道輪派哨船。於山東奉天等處。確切查探。並嚴飭沿海一帶文武員弁。認真巡防。妥為駕馭。不准其駛進海口。以期仰副

聖主肅清畿輔。綏靖海疆之至意。

諭軍機大臣等。訥爾經額奏。夷船寄碇大沽海口。業經曉諭開行一摺。本日已有旨諭知耆英。令其詢問。喋喋喧矣。天津並非議

定通商馬頭。此次大沽寄碇夷船。自應不准其進口。且其中查有廣東語音二十餘人。尤難保非內地奸徒。勾串越界私販。該督於該夷船甫經下碇。即飭委員等明白曉諭。令其開行。並不准其以三板船進口。自購食物。所辦均屬妥協。惟該夷等皆惟利是圖。而洋路又處處可通。前次曾有夷船駛入山東文登縣界停泊。布散貨單。此次復有夷船裝載貨物。來津售賣。現在雖經該督曉諭。業已起碇開行。實難保不更有續來之船。著該督仍嚴飭沿海一帶文武員弁。認真巡防。如再有夷船駛至。希圖銷售私貨。即照此次辦理。妥為駕馭。不准駛進海口。以杜越界而絕覬覦。

又

十二

諭。據訥爾經額奏。大沽口攔江沙外。寄碇夷船二隻。內有廣東語音者約二十餘人。白黑鬼子約五六十人。據稱係喋喋喇國貨船。裝載貨物。從新州府販來售賣。並給喇號貨單。經委員等明白開導。始向東南駛去等語。喋喋就撫通商。業已在廣州開市。其通商馬頭。自有一定處所。何以以前忽有船駛至山東。茲復駛至大沽洋面。徑稱喋喋喇貨船。希圖售賣。著將該船貨單。發交耆英。令其曉諭。喋喋喇查明係該國何項夷船。私自潛往各處。務須一律嚴行禁止。不得任其於議定馬頭之外。妄希貿易。以致有違成約。是為至要。原摺著鈔給閱看。

軍機大臣穆彰阿等奏。內閣鈔出。臣等英等奏通籌海關收稅。並解支禁革各事宜。臚列條款。整頓稅務一摺。七月十六日奉

硃批。軍機大臣會同該部議奏。欽此。臣等詳加叢議。將籌議各條。臚列於後。

一粵海關原定稅額。應暫歸五口勻攤一款。據原奏內稱。粵海關應征外洋及內地正稅。並額定盈餘。向來照數征解之外。尚有額外盈餘。現既分五口通商。若仍令粵海關照舊征解。勢有所難。此後粵海關征不足數。應請於福州廈門寧波上海各關。所征西洋各國貨稅內。撥補足數等

十三

語。臣等查粵海關每年額征正稅。並額定盈餘。共銀八十九萬九千六百四十四兩。除每年照數征解外。尚有盈餘自一二十萬至三四十萬不等。現在沿海各關。既准通商。閩浙江蘇所收西洋各國貨稅。皆由粵省分出。必較往年征收稅數為多。而粵海一關稅銀。不免短絀。自係實在情形。應如所奏。此後粵海關征收不足之數。即由福州廈門寧波上海等處。所征西洋各國貨稅內。撥補足數。以昭平允。一五口征收西洋各國稅額。請試行三年。再行酌定一款。據原奏內稱。西洋各國貨稅。本為福州廈門寧波上海所無。現在甫准通商。稅額難以定准。粵海關將來能否足額。

亦不能預定。請俟三年後。察看五口每年徵稅各若干。再行酌定等語。臣等查沿海各關。自通商以後。西洋各國。自應踴躍而來。惟各口通商衰旺。尚難懸擬。若遽照一年征收之數。作為定額。難以各得其平。應如所奏。於試行三年後。比較各口征收額數。再將粵海關原定稅額。分款科算。勻攤閩浙海江海各關。以歸覈實。

一粵海關雜稅款目。應行刪除一款。據原奏內稱。粵海關除正稅耗羨之外。尚有節次歸公等項。雜稅隨正征解。今既歸作一條編征。綜計均尚有盈無絀。所有歸公案內雜項名目。無論已未查明。請一概刪除等語。臣等查粵海關

十四

正稅盈餘。例有定數。惟正稅之外。節次歸公案內。款目繁多。如耗羨歸公等項。向係隨正征解。今既無分正耗雜款。歸作一條編征。應如所奏。一切雜項名目。概請刪除。以歸簡易。

一平餘備貢等款。應歸額外盈餘項下開銷一款。據原奏內稱。粵海關解部銀兩。每千兩加平餘銀十五兩。按稅加收。今歸作一條編征。此項無從抽取。請在額定盈餘項下開銷。各歸各關劃解。本年新加之二十五兩。亦照此辦理。又每年應解備貢銀五萬五千兩。人漫變價銀約十萬兩上下。均由洋商按貨抽算。彙繳監督。轉解內務府。又有放

關分頭名目。亦由洋商按貨抽算。每年約征銀四五萬兩。繳糧道衙門。撥充普濟堂等項之用。現在暎咭喇國已議裁洋商。償其餘各國。亦一體議裁。前三項銀兩。亦歸無著。請將每年變價淺斤。無庸飭發。其價銀以十萬兩為率。與備貢銀五萬五千兩。在各關盈餘數內。視征數之多寡。均勻攤解。其放關分頭銀。於粵海關盈餘項下。撥銀四萬兩。解交糧道衙門等語。臣等查粵海關解部銀兩。每千兩加平十五兩。今據稱歸作一條編征。此項無從抽取。應准其在盈餘項下開銷。各歸各關劃解。本年新增之二十五兩。亦即照此辦理。又所稱每年應解內務府備貢銀五萬五

十五

千兩。人淺變價約銀十萬兩上下。及放關分頭名目。約銀四五萬兩。撥充普濟堂等項之用。均由洋商抽算彙繳。現在暎咭喇國已議裁洋商。三項均歸無著。請將每年變價淺斤。毋庸飭發。價銀以十萬兩為率。與備貢銀五萬五千兩。在各關盈餘數內。均勻攤解內務府。查每年臣衙門發交粵海關淺斤變價銀兩。係備支發精捷營新陳槍營兵丁操演公費。進班口分。並

賞給侍衛處軍機處步軍統領衙門內務府等處淺銀。及三旗養育兵錢糧等項之用。上年兩廣總督祁項等會奏。請將變價淺斤暫停飭發。俟該商等所借庫款二百八十萬兩。遵

限四年完繳清釐。仍行照常請領售變。經臣衙門以此項變價銀兩。均係支發各營兵丁錢糧公費。帑項攸關。未便准其暫停領售。請將該商等所借分限四年庫款銀二百八十萬兩。每歲完繳七十萬兩內。擬令每年交該省藩庫銀六十萬兩。其餘十萬兩。覈計發去淺斤成數。抵作變價之款等因。具奏。奉

旨依議。欽此。欽遵在案。今據

欽差大臣耆英等奏。籌議沿海關口收稅事宜條款摺內。以備貢銀五萬五千兩。淺斤變價約銀十萬兩。向均由洋商按貨抽算。彙繳監督轉解。現在暎咭喇國已議裁洋商。償其餘

十六

各國。亦須一體議裁。則此項銀兩。亦歸無著。請將每年變價淺斤。毋庸飭發。其價銀一款。每年以十萬兩為率。與備貢銀五萬五千兩。一併在各關額外盈餘數內。劃出攤解等語。查此項變價銀兩。係支發各營兵丁錢糧公費等項之用。該大臣等議以各關額外盈餘數內。劃出攤解。惟粵海關額外盈餘一款。亦係歸公之項。且並無定額。該大臣等所奏加平備貢等款。均由額外盈餘項下撥解。設每年所收額外盈餘。不敷撥解時。則此項變價銀兩。難期如數解交。如有拖欠。各營兵丁錢糧。即無款可支。於臣衙門經費。大有關係。且

盛京等處。每年解到淺斤。若粵海關一處停止。飭發他處。更難售變。況經臣衙門奏准。自二十三年至二十六年。每年解交淺斤變價銀十萬兩。係在該商等分限四年。應完繳二百八十萬兩。庫款之內。於商力已有變通。自不應藉口更張。而現在僅祇嘆咭喇國議裁洋商。其餘各國貨稅。仍須洋商經理。所有變價淺斤一款。仍應照舊發交粵海關飭商領售。將價銀依限批解。以重帑項。再查備貢銀五萬五千兩一款。亦係由洋商按貨抽算。彙繳該監督。每年解交造辦處豫備。

上傳一切活計。及匠役等錢糧之用。亦難稍有遲緩。且此款銀兩。

十七

既向與淺斤變價之款。均由該商彙繳。今亦未便由各關額外盈餘攤解。其應如何辦理。及變價淺斤。如何交商售變之處。由粵海關監督自行妥議辦理。其放關分頭銀兩。應准其於粵海關盈餘項下撥銀四萬兩。解交糧道衙門。以充公用。其餘各國。如仍須洋商經理。應令體察情形。酌量辦理。毋滋流弊。

一粵海關酌留羨餘以備公用一款。據原奏內稱粵海關每年有應進貢品。及奉文備辦物件等項。約需銀十數萬兩。現在羨餘均歸入盈餘項下。而一切均不可少。請於粵海關盈餘項下。酌留銀十二三萬兩。以備支用。如有餘存。

儘數報撥。儻有不足。由福州等各海關盈餘內協濟等語。內務府查羨餘一款。既歸入額外盈餘。自非例准作正開銷之款。不應動支。且查各關差織造所進貢品。較之粵海關款項雖少。均向不開銷。今原奏內酌留銀十二三萬兩。以備呈進貢品。及奉文傳辦物件之需。未便准行。臣等公同酌議。嗣後凡有奉

旨傳辦物件。每年應需銀兩。難以預定。擬令該監督覈實辦理。准其作正開銷。其該監督向例呈進貢品。應如何籌款之處。由該監督自行辦理。

一四口應補征內地各關湖絲稅銀一款。據原奏內稱。西

十八

洋各國出口貨物。由內地客商運至廣東。經過各關皆應納稅。今改為五口通商。內地商販。自必各趨近便。除各項雜貨為數無多。又茶葉大黃。已加增稅銀。毋庸再議。惟湖絲一項。為外國所必需。現與再三辯論。始定每百斤完稅一兩。統雜項平餘計之。尚較從前每百斤減銀一兩二錢零。應飭令內地客商販運湖絲。赴福州廈門寧波上海四口。與西洋各國交易者。少過一關。補納一關稅數。以藉補苴等語。臣等查內地客商。與西洋各國交易者。向係運至廣東。今福州等處。既准通商。自必各趨近便。據稱湖絲一項。外國必需。現在議定稅銀。較從前銀數為少。應如所奏。

嗣後內地客商販運湖絲前赴福州廈門寧波上海等處與西洋各國交易者查明赴粵程途少過一關即在卸貨關口補納一關稅數以補不足其與各國商人交易及其餘貨物仍照舊章辦理如有丁胥人等藉端勒索即行嚴加懲辦

一內地各商販賣茶葉湖絲綢緞不准由海載運一款據原奏內稱茶葉湖絲例禁出洋近有內地各商將茶葉等貨搭船海運各關稅額短絀實由於此現定章程於西洋各國應完稅銀大有加增易啟避重就輕與洋船私相交易之弊嗣後除往返東洋等國進出貨稅與本地民間日

十九

用各物仍循其舊外所有內地茶葉湖絲綢緞三項止准由內地行走有願由海運者照與西洋各國貿易例一體定稅等語臣等查茶葉湖絲例本禁止出洋茲據稱內地各商將行銷各省茶葉等貨搭船海運以致關稅短絀應如所奏內地行銷茶葉湖絲綢緞三項不准涉海有願由海販運者即照與西洋各國貿易章程完納稅銀方准出口以裕稅課而杜流弊其往返東洋等國進出貨稅與本地民間日用各物仍循其舊各海關則例內蘆茶蘆絲土絲各名目應即一併刪除其臺灣等處應用茶葉絲斤綢緞應請

飭下該督撫悉心妥議另行請

旨辦理

一與西洋各國貨稅無涉之客貨應仍照舊章辦理一款據原奏內稱粵閩江浙等省商民出入海口販運土產上至

咸京下至廣東往來貿易除茶葉湖絲綢緞外所有五處海關無論大關小口悉照舊章完稅等語臣等查粵閩江浙等省商民販運土產甚多內除茶葉湖絲綢緞外均非西洋各國所需無虞影射向來應完稅銀本有定章相安已久所有五處海關一切章程應仍其舊以杜弊竇而免紛

二十

更。

一各項浮費應全行革除以杜弊端一款據原奏內稱各貨浮費不知凡幾現將浮費全行裁革如有需索無論官弁兵役俱照枉法贓治罪惟粵海關差役並無工食現在浮費裁撤請查照海關書吏之例覈給工食由臣祁墳酌定名數銀數等語臣等查各項浮費於雍正乾隆年間改正歸公茲又陸續添出更多於前應將浮費全行裁革如有需索情事應無論官弁兵役俱照枉法贓治以應得之罪至粵海關差役向無工食由洋商按貨抽給現在浮費裁撤未便令其枵腹從事其覈給工食應由該督酌定名

數銀數妥為辦理奉

旨依議

庚辰山東巡撫臣梁寶常奏竊臣前接福山等縣稟報七月十一日有雙桅夷船二隻駛入福山縣之罟島停泊當經批飭署登州府知府張輔馳往確查一面先行附片奏聞旋於七月二十九日承准軍機大臣字寄奉

上諭該夷通商業經議定五處馬頭山東地方並非該夷貿易之地著該撫嚴禁各海口商販不准私相交易並著查明是否奸民勾串現在開駛何處據實具奏欽此正在欽遵轉行聞即據署登州府知府張輔稟報該府未抵福山以前該夷船在

二十一

之罟島因風色不順守泊數日無人交易旋即開放外洋於二十一日又駛至蓬萊縣之廟島游奕該處洋面距府城僅五十餘里即經該府就近督飭署蓬萊縣知縣善玉埠會同水師員弁親赴廟島查明船形一大一小大夷船名得利船主名梁三號小夷船名孤鴻船主名担臣大夷船通事黃姓商人張姓黑白鬼子四十餘名廣東人十六七名兼有漢人假扮黑鬼子數人廣東女人數口小夷船黑白鬼子三十餘人廣東人十餘名據稱該夷目是商非官來自舟山嘯嘯喧並未知悉惟粵人男婦在船較多其為內地奸商勾引似無疑義詰以東省並非原議馬頭因

何違約私至該夷無詞以對只稱俟風順即行又經以理剴切曉諭並多派巡船在海口出入處所梭織稽查不准商民一物私相交易該夷人旋於七月二十五日起碇往西北大洋駛去查廟島西北係赴奉天津等處必由之路臣前已咨會

盛京將軍直隸督臣並飛咨飭屬一體防範杜其貿易之端自可永絕覬覦之望惟該夷就撫甫經議定馬頭即有夷船違約私至東省洋面直達江浙恐上海等處開市之後夷船更不難就近北駛且恐有別國夷船假冒該夷者除仍飭沿海文武員弁隨時嚴查口岸不許本地奸商私相

二十二

勾結外應請

飭下

欽差兩廣督臣耆英照會該夷首嘯嘯喧徧諭該國商船各守前約嚴禁越界私販以杜流弊

諭軍機大臣等前據梁寶常奏山東洋面停泊夷船二隻又據訥爾經額奏天津洋面有夷船寄碇疊經降旨交耆英向嘯嘯喧查詢嚴禁矣茲據梁寶常奏東洋停泊夷船係一大一小查明船名及船主姓名內有粵人男婦並稱該夷目是商非官來自舟山現已起碇往西北大洋駛去等語所奏甚屬詳明著耆英按照該撫摺內所開船主姓名向嘯嘯喧詢問是否係該夷船

夷商何以違約私至各處洋面希圖貿易務即飭諭該國商船恪守前約向原議碼頭通市不准越界私販並禁止沿海奸民毋得勾串夷商潛蹤遊奕以杜弊端梁寶常原摺著鈔給閱看庚寅直隸總督訥爾經額奏大沽海口攔江沙外寄碇夷船二隻前據委員曉諭開行經臣奏蒙

聖鑒一面仍飭天津鎮道派弁駕船尾隨俟駛出直隸洋面向往何處再行稟報在案茲據該鎮道會稟稱當派外委張得祥駕駛哨船跟蹤查探去後現據回稟閏七月初四日該夷船二隻駛至山東廟島地方即在島內之鵲兒嘴停泊初五日即起碇向東南駛去等情稟報前來臣查該夷船

二十三

雖已遠去而洋路處處可通難保無續來之船希圖銷售貨物現仍諄飭鎮道並沿海文武員弁認真巡探並移咨盛京將軍飭屬一體嚴防硃批知道了

癸巳福州將軍兼管閩海關保昌奏竊照廈門關稅前經奏明停征嗣因夷情就撫當即奏請開關奉

旨保昌奏廈門稅務未便久停酌擬開關征收一摺現在各省海關稅則尚未據著英議定該將軍所請將查稅小口移設新嶼之處著即咨商者英俟其咨覆到時妥籌辦理等因欽此欽遵咨商去後茲准著英咨覆以等所請開關征收者係內地

商船貨稅與英咭喇等國洋貨無涉現在江浙稅口於夷船退去後已照舊辦理所有廈門征收內地商稅及將查稅小口移設新嶼之處應如原奏迅速辦理等情咨覆前來等伏查廈門關口一經征稅則商船巡船與英咭喇船隻同在一港帆檣相摩較之江浙各稅口夷船業已退出情形不同現既准著英咨覆應即迅速開關自應妥為經理方昭慎重況廈門地方情形凋敝迥異從前更恐行商因夷船在港從中影射漏私均應設法整頓冀裕關課漸復舊章除派管稅委員書役等剋日前往征解外仍查照前奏選派明練協領霍隆武馳赴該處會同廈門道廳將

二十四

移設查稅小口以及一切應辦事宜妥為經理一俟辦有規模即令該協領回任再將征納情形另行具奏

硃批戶部知道

庚子

欽差大臣兩江總督著著兩廣總督祁墳廣東巡撫程喬采粵海關監督文豐奏竊照英咭喇等國在臣祁墳衙門呈請代求

恩施准與英咭喇國一體前赴各省貿易經臣祁墳臣著著及伊里布先後奏奉

諭旨英咭喇等國請照新定章程辦理著俟定議後要約

明白另行辦理等因。欽此。臣等伏查各國來粵貿易船隻。惟啖
咭喇及其所屬之港脚為最多。其次則味喇啞幾與相埒。
此外止荷蘭國。每年有貨船自三四隻至十餘隻不等。尚
有啖喃西國。呂宋國。連國。瑞國。單鷹國。雙鷹國。甚波立國。
來船或有或無。或多或少。大約每國一二隻。至多不過有
五六隻。今啖咭喇通商章程。業已議定。其上海等處馬頭。
亦不敢獨擅其利。且定海等處。皆有啖喇啞貨船。與啖夷
同幫共泊。急望開市。自應先與味喇啞定議通商。惟前在
臣祁墳衙門。投遞文信之夷目。已於三月中。臣耆英
未到之先。揚帆回國。僅有代理領事喀啞者。在粵管理貿

二十五

易事宜。復在臣耆英前。稟請遵照新章貿易。臣等即因勢
利導。宣布

皇仁。准照新章。在閩廣江浙等五口。輸稅貿易。以示懷柔。即據該
夷稟陳感激之忱。惟稱進口貨物。內洋淺鉛斤二項。產自
該國。向因稅則繁重。每多偷漏。現在浮費雖奉刪除。而新
定稅則。上洋淺每百斤。完稅三十八兩。下洋淺每百斤。完
稅三兩五錢。黑白鉛每百斤。完稅四錢。叢計賣價。幾將十
抽四五。各該商不獨無利可圖。且多折耗。請以百斤取五
為率。上洋淺每百斤。征稅四兩。下洋淺每百斤。征稅二兩
七錢。鉛斤每百斤。征稅二錢。臣等因稅則業已議定。具奏

該夷首先請改。若各國紛紛效尤。殊屬不成事體。當即駁
飭去後。又據該夷稟稱。洋參一項。原來係屬不分上下。約
計每百斤。內有上下等各半。應與鉛斤一併暫遵新例。覈
實完稅。但現在該國船隻未齊。俟夷目前來。飭行定議等
情。臣等誠恐其言不實。不盡。即密派親信前赴市間購買。
上等洋參一斤。用銀一兩四錢。叢計每百斤。值銀一百四
十兩。又詳加確訪。洋參價值。隨來貨多少。為貴賤。賤時每
斤。不過值銀一兩內外。該夷所請。尚非逞刁要挾。且查每
年來貨。上等洋參。不過四百餘擔。下等洋參。不過千擔。鉛
斤。不過二百餘擔。即照請酌減稅則。每年止少收數千金。

二十六

與其因稅重而偷漏走私。且將藉為口實。莫若示寬大。而
覈實征收。免其另生枝節。但現在啖喃西等國。尚未議定。
未便遽開其端。容臣等通盤籌定。另行奏明。請
旨。至啖喃西國。每年來船數目。雖屬無多。而從前為西洋強盛之
國。就現在通市各國而論。該國在粵通市。最為年久。向來
不肯因人成事。先有夷目。嗔喊。噫。自稱領事。寓在澳門。遣
其副目。吵哩來省。投遞單稟。議及往來儀禮。並輪稅章程。
又稱此單未足為據。臣等當即派員前赴澳門。向嗔喊。噫。
切實查詢。又有夷目。啦。噤。以嗔喊。噫。冒充領事。吵哩
在省無禮。已將吵哩斥革。兩次赴臣祁墳衙門具稟。求與

臣見面。臣等因真假難辨。現在密加訪查。一俟得實。即與見面定議。大約數日內亦可完結。其荷蘭等國。船尚未到。來否不能豫必。即使陸續前來。各該國船少勢孤。素稱恭順。仰蒙

皇上一視同仁。自不致有異議。此向在番禺縣黃埔停船起駁。前往廣州貿易各國之約畧情形也。又大西洋之意大里亞國。自明迄今。住居香山縣之澳門地方。額定商船二十五隻。准其前赴各國販貨來澳。自行發賣。其貨稅皆出於前。往澳門買貨之華商。該國止完船鈔。與廣州貿易各國章程不同。本可毋庸另議。惟澳門向有在廣州貿易各國。夷

二十七

人因廣州無容身之地。前赴該處。向意大里亞賃房居住。現在啖夷既往香港。新定章程。又准五口通市。各該夷散之四處。澳門之房租勢必漸少。買賣亦不能如前。意大里亞生計頓蹙。情實向隅。現據懇求設法辦理。臣等詳加體察。必應量為變通。亦已委員前赴澳門。與該夷目從長計議。似亦易於完結。此在澳門貿易之意大里亞國大畧情形也。總之西洋各國。以通商為性命。

天朝制馭之術。全在一切持平。不事苛求。務存大體。則崇驚之氣。不抑而自消。且可收少取。即所以多取之效。臣等惟有不避嫌怨。則浮費以蘇夷累。增稅餉以裕

國用。庶期華夷輯睦。永久相安。以仰副聖主綏靖海疆之至意。

硃批。勿顧目前。總要籌及大者遠者。議定後即行具奏。

者英程喬采祁墳文豐又奏。竊臣等英前因啖夷喇急於通市。附片奏明。即照伊里布前定期限。於七月初一日。先在廣州開市。欽奉

諭旨。著即照議辦理等因。欽此。欽遵在案。臣等伏查各國貨船。向年皆於六月以後。先後來粵。隨時售貨完稅。俟來年二三月間。裝載出口貨物。陸續回帆歸國。其後到之船。為數無多。是以粵海關征收稅銀最旺之期。在於秋冬之交。現在

二十八

七月初一日。查照新定章程開關以來。截至閏七月初十。共有進口啖夷喇哩啞二國貨船五十三隻。各投業所相信之行店十餘家。貿易貨物完納稅餉。華夷均極安靖。市肆閭閻。恬熙樂業。一切照常。計已征收過稅銀十二萬八千九百餘兩。比較上年七月初一日。至八月初十日所收稅數。有盈無絀。歷來各國商船。應還有無出口者。為數口。現在洋船甫到。所收皆係進口之稅。間有出口者。為數亦甚細微。轉瞬抽收出口貨稅。自必更見充盈。將來福州等四口開市後。粵海關勢雖遜於往年。而統五口計之。稅數加增。其機已見。洵堪仰慰。

宸廬。惟粵海關口岸散漫。港汊紛歧。必得多派書役。逐段巡邏。其計擔納稅。按貨過秤。動輒以數千百擔計。所需人役。實屬不少。從前此等人役。皆係收私擔頭銀兩。並無工食。現在浮費全裁。竟致枵腹從事。其勢不能不為酌籌經費。以資糊口。而杜弊端。容臣祁墳。臣文豐另行籌議辦理。至要約各條。皆已定議。日內本可完結。惟因夷首嘯嘯。不識漢字。必須夷目嗎嚕噠譯出夷字。與彼商定。再譯漢文。始能繕成書冊。今嗎嚕噠於閏七月初五日。因熱症暴斃。已由臣者英飛飭嘯首。另派通習漢文之夷目。迅速繕譯。大約又須數日。不致因之延誤。

二十九

硃批覽奏均悉。一切妥商辦理。

諭軍機大臣等。本日據着英等奏。查辦味喇堅等國通商大畧情形。並粵海關開市以來。華夷安輯。貿易照常。各一摺。覽奏均悉。西洋各國。以通商為性命。制馭之術。全在一切持平。務存大體。尤宜籌及久遠。勿得僅顧目前。所有味喇堅等國通商章程。著議定後。即行具奏。至要約各條。現飭嘯首另派通習漢文之夷目。迅速繕譯。各等情。俱著妥商辦理。其撫約內交不足數加息之說。前曾諭令就近會商。從長計議。現在籌辦若何。如已定議。亦即速行具奏。

八月辛丑。浙江提督三等伯李廷鈺奏。伏查浙省洋面。南

連福建。北接江南。延長二千餘里。海面遼闊。島嶼繁多。每年南風司令。則有閩省匪船。乘風竄入。冬令北風。則有江省閩頭舢板。越界伺竊。而本省沿海土匪。亦有乘機而發。又四五月間。定海北洋捕鯨漁汛。閩浙江南之三省漁船。雲集採捕。其中奸良不一。往往就洋滋事。巡防緝捕。均關緊要。前年因喫夷滋擾。水師沿海各營。均須防堵口岸。不能專注巡緝。遂致匪徒肆無忌憚。報切頻聞。粵抵任後。嚴督勦辦。先後擒獲盜犯數起。及船隻軍械等件。就近解交地方官研訊懲辦。現在漁民咸安本業。浙洋漸就安靜。至甯郡地方。五方雜處。良莠不齊。且人心浮動。每喜造言生

三十

事。前因夷務雖經就撫。而定海夷船。尚在逗留。又時有夷人前來購買食物等件。並以粵新定章程。督兵操練。較前嚴緊。因而無賴之徒。散布謠言。冀圖聲動閭閻。以遂其攘竊之計。其心實屬叵測。粵以為浮言不息。則民生不安。所關匪細。即會同道府。督率營縣。嚴密訪拏。並經升任督臣劉韻珂出示。剴切曉諭。即經漸止。現在定海夷人。來郡購買物件。較前稀少。民間亦習慣相安。謠言止息。惟是指日甯港。即辦通市。尤宜禁絕一切浮言。惟有遵奉

明諭。會督文武。明查暗訪。並嚴禁兵役藉查滋擾。以安編氓。現接欽差大臣耆英來信。知廣州已於七月初一日。權先開市。所有甯